

VOLONTARIAT

I Studafech de Fascia, la più bela gema de la Dolomites

I pompieres à festejà la patrona Sènta Bèrbola. Te la zerimonia, stata chest an a Soraga, l'è ruà paroles de rengraziament e recognoscentia per l servije a la comunanza

«Siede la più bela gema de la Dolomites e del Trentin» coscita li à chiamé la senatora e procuradora del Comun general de Fascia Elena Testor i Studafech del Distret de Fascia. No la é era prejentà a la festa de Sènta Bèrbola en mercol ai 4 de dezember ajache la era impegnada a Roma, ma l'ha fat ruèr na letra che é stata leta jù te sala da l'Ispektor Giancarlo Pederiva. Na letra che con paroles sentudes de rengraziament à binà ensema l'aveval per duta la comunanza de Fascia per n grop de omegn e femenes voluntadives che se spen te ogni moment per la segurezza de sia jent.

I era de presciapech 200 i Studafech de Fascia che se à troà per onorèr la Sènta Patrona dant te geija de Soraga per la messa ofizièda da sie compagn Studafech don Mario Bravin e dopò te La Gran Ciasa per l moment ofizièl de rengraziament.

Dò aer recordà en curt la vita de Sènta Bèrbola, che stèsc sora i Studafech ensema a Sèn Florian, don Mario l'ha domanà se aldidanché l'ha amò n sens aer na sènta protetora. «N'outa i preèa i sènc protetores percheche i li vèrde via e i li deide a se vadagnèr i paradisi, aldidanché chest passaje l dajon beleche per scontà e se no aon fe, emben no servissia più preèr n protetor. Preèr Sènta Bèrbola l'ha amò segnicat se vardon a l'ejempie de chesta sènta,

n ejempie de costanza, de empegn e de forza». Valores che al Studafech no cogn mai ge mènchè e che de spes, soraldut te chest ultim temp, i à desmostrà de aer, senza rechia, senza tema, senza mai se tirèr endò.

Paroles de lauda é states palesèdes dal president de la Federazion di Studafech del Trentin Tullio Ioppi, da l'ombolt de Soraga Devi Brunel, ence el Studafech, dal rapresentant del BIM Adesc Francesco Dellantonio e dal conseier provinzièl ladin Luca Guglielmi.

«I ne chiama agnoi e eroes – l'ha dit Ioppi – ne fèsc piàjer ma chisc sorainomes no cogn ne fèr desmentìr la roba più emportanta: l'umoltà. Più sion umoi e più chest ne deida a stèr al servije di etres e a ge dir de sci a chi che ne chiama per besegn».

Apede a la perseveranza e a la fermeza l'è stat rejonà tant ence de preparazion e de formazion. «Cognon semper aer tel cef che no saon assà – l'ha dit Ioppi – e che cognon semper esser formé a na vida concreta e al pas coi neves mesi e neva technologies».

Ence l'Ispektor Giancarlo Pederiva à sotlineà desvaliva outes chest aspet. «La formazion la é primaria – l'ha dit – e aon investì n muie sun chest. La Provinzia ne à dat n container per far le proe contra l fum e a Cianacei aon na struttura per le proe contra l fech che cognon vardar de durar al micc per aer la preparazion giusta,

no podon più pissar che la mondura ne fasc esser «invincibili». L'è stat envià via n projet a livel provinziàl en colaborazion col 118 per la formazion su la doura di defibrilatores, l'è emportant che più persone che l'è meso saesse durar chisc enignes che salva la jent. Volesses ge sporjer n fort devalpai ai Comandanc di desvalives gropes, ai Istrutores, ai referenc di Arlieves, a Denise per l lurier che la fasc per l Distret e al secretar Giuliano – l'ha jontà apede Pederiva».

Dantfora l'è stat n menut de acort per tre Studafech che é morc endèna l servije e dapò la consegna de l'atestat de recognosciment per i egn de servije. N papier che ge desc valuta e emportanza a l'empegn de chisc omegn e femenes, persones desche nos, che aon apede ogni di, ma che canche i sent sonèr l fonin, i mola dut e i cor percheche ogni moment che passa l'è vital.

«Duc chenc fajon pèrt de la gran familia di Studafech – à dit Ioppi – no l'è Pompieres senza sia familia che li sostegn e li deida te sie servije, per chest ence a ic va n fort devalpai».

De n muie te sala i à vedù la gran nigola de Studafech arlieves. A ic l'è jìt l'envit a tegnir dur, a emparèr da chi più gregn, ge fèr dō e esser semper piens de gaisa per l bel servije de volontariat che i fèsc per sia comunanza.

I Studafech del 2019 à spenù passa 10 mille ores

I numeres uzé fora da l'Ispektor Pederiva moscia n an belebon chiet, a confront de chel dant con l tormen Vaia. I Studafech del Distret de Fascia é entervegnui te 603 evenc, de chisc 325 outes per intervenc, 137 per formazion, 45 per manifestazions, 57 per prevenzion, 14 per scontrèdes e 25 per manutenzion. Chest an i Studafech i à spenù 10.445 ores, presciapech 7.000 de manco respet a l'an dant. De chestes 2.682 é states per intervenc, 3.400 per la formazion e 2.617 per manifestazions. L'Ispektor Pederiva à recordà la gran tampesta de messèl te Val de Sèn Nicolò olache l'è vegnù jù n muie de èlbres e l'è restà te anter n auto senza consequenzes per fortuna per chi che vidèa, la femena morta te la èghes del Gial e la piantes crodèdes anter Ciampedel e Cianacei a la metà de november.

Amò de jené l'è stat endrezà i Campionac taliegn de schi di Studafech che à abù n bon suzess ence con sia manifestazions da cornisc de gra a la colaborazion de n muie de sociazions e gropes de volontariat. La festa é jita inant con la consegna di atestat de merit e con n bon marindèl.

Monica Gigolla



N diplom per i egn de empegn

Chisc i Studafech premiè per si egn de servije

Cianacei Bruno Testor (35 egn), Luca Testor (30), Stefano Riz e Mauro Debertol (20) e Stefano Salvador (15).

Ciampedel Ivo Rasom (25) e l comandant David Favè (20).

Poza Ivan Pezzei e Paolo Lastei (30), Claudio Cincelli (20), Letizia Soldà, Ermanno Pesciol, Mirko Gabrieli, Giacomo Florian, Fabrizio Crepez, Francesco Cincelli (15).

Vich Fabio Bernard (30) e Andrea Oberthaler (20).

Soraga Devi Brunel (25).

Premiè per l tormen Vaia Patrick Ghetta, Giovanni Davarda, Nicolò Cianiulli e Antonio Cincelli.



La premiazions di Studafech del Distret de Fascia per si egn de servije a la comunanza.